

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZENICA**

OBRADIVAČ: SLUŽBA ZA FINANSIJE

**IZVJEŠTAJ
O PROVEDENOJ JAVNOJ RASPRAVI NA
NACRT BUDŽETA GRADA ZENICA ZA 2023. GODINU I
NACRT ODLUKE O IZVRŠAVANJU BUDŽETA
GRADA ZENICA ZA 2023. GODINU**

Zenica, februar 2023. godine

**IZVJEŠTAJ O PROVEDENOJ JAVNOJ RASPRAVI NA
NACRT BUDŽETA GRADA ZENICA ZA 2023. GODINU I
NACRT ODLUKE O IZVRŠAVANJU BUDŽETA GRADA ZENICA ZA 2023. GODINU**

Na 29. sjednici Gradskog vijeća Zenica, održanoj dana 16.01.2023. godine, utvrđeni su Nacrt Budžeta Grada Zenica za 2023. godinu i Nacrt Odluke o izvršavanju Budžeta za 2023. godinu, te su isti upućeni na javnu raspravu u trajanju od 10 dana od dana održavanja sjednice Gradskog vijeća, odnosno zaključno sa 26.01.2023. godine.

Utvrđeni Nacrt Budžeta Grada Zenica za 2023. godinu, Obrazloženje Nacrta Budžeta Grada Zenica za 2023. godinu i Nacrt Odluke o izvršavanju Budžeta Grada Zenica za 2023. godinu sa Obrazloženjem objavljeni su na web stranici Grada Zenica (www.zenica.ba).

Na samoj sjednici vijećnici su iznijeli svoje primjedbe, prijedloge i sugestije, i na većinu primjedbi predlagač je odmah dao svoj stav.

Predlagač je dana 23.01.2023. godine, uputio Javni poziv za održavanje Javne rasprave o Nacrtu Budžeta Grada Zenica za 2023. godinu i Nacrtu Odluke o izvršavanju Budžeta Grada Zenica za 2023. godinu, kojim su pozvani svi zainteresovani subjekti (predstavnicima službi, politički subjekti koji imaju vijećnike u Gradskom vijeću Zenica, predstavnici Udruženja privrednika/poslodavaca Grada Zenica, predstavnici mjesnih zajednica sa područja Grada Zenica, predstavnici udruženja koja djeluju na području Grada Zenica, zainteresovani građani i svi drugi zainteresovani subjekti) da dana 25.01.2023. godine prisustvuju Javnoj raspravi. Javni poziv objavljen je u elektronskim medijima i na službenoj web stranici Grada.

U toku javne rasprave dostavljene su primjedbe, prijedlozi i sugestije na Nacrt Budžeta Grada Zenica za 2023. godinu i Nacrt Odluke o izvršavanju Budžeta Grada Zenica za 2023. godinu, a Služba za finansije je iste prosljedila nadležnim budžetskim korisnicima na razmatranje i nadležno postupanje.

U nastavku dajemo pregled dostavljenih primjedbi, prijedloga i sugestija sa stavom predlagača, odnosno nadležnog budžetskog korisnika.

1. Vijećnik Osman Šuvalić i Udruženje građana Romske suze - Romane ASVA Zenica predložili su da se Prijedlogom Budžeta za 2023. godinu planiraju sredstva i za:
 - sufinansiranje zdravstvenog osiguranja pripadnika romske populacije i građana Grada Zenica u iznosu od 35.0000,00 KM i
 - finansiranje rada udruženja "Romske suze" za dopunsko obrazovanje romskog jezika, kulture i historije u iznosu od 7.000,00 KM.

Stav predlagača

Stav resorne službe - Službe za socijalnu zaštitu, stambene poslove i društvene djelatnosti je sljedeći:

- oblast zdravstvenog osiguranja je regulisana Zakonom o zdravstvenom osiguranju FBiH i kantonalnim propisima. Međutim, i pored toga Prijedlogom Budžeta planirana su sredstva za ove namjene u iznosu od 35.000,00 KM, uz napomenu da je prethodno neophodno izvršiti izmjenu kantonalnih propisa u smislu iznalaženja rješenja za realizaciju navedenih sredstava,
- budući da se planirana sredstva za finansiranje rada udruženja raspoređuju putem javnih poziva, kao i finansiranjem programskih aktivnosti nevladinih organizacija/civilnih društava po pojedinačnim zahtjevima, neophodno je da se na iste prijavi i udruženje Romske suze - Romane ASVA.

2. Udruženje veterana BiH rata i odbrane bosanske časti predložili su da se planiraju sredstva za realizaciju projekta "Izgradnja jarbola i zastave države BiH u MZ Gradište" Zenica, u iznosu od 100.000,00 KM.

Takođe, Almir Čamdžić predsjednik udruženja RVI i Klub vijećnika BHI-KF tražili su povećanje sredstava na budžetskoj poziciji "Transferi za finansiranje programa i projekata udruženja i organizacija boračke populacije".

Stav predlagača

U okviru Službe za boračko-invalidsku zaštitu, na budžetskoj poziciji "Transferi za finansiranje programa i projekata udruženja i organizacija boračke populacije" Nacrtom Budžeta za 2023. godinu planirana su sredstva u iznosu od 200.000,00 KM, i ista se realizuju prema dostavljenim zahtjevima i provedenim javnim pozivima. Predlagač je razmotrio i prihvatio ovaj prijedlog, i u skladu sa trenutnim mogućnostima, Prijedlogom Budžeta uvećao sredstva na ovoj poziciji za iznos od 50.000,00 KM.

3. Advokat Jasmin Mutapčić, kao punomoćnik tužitelja - mještana naselja Pečuj, predložio je da se u Prijedlogu Budžeta Grada Zenica za 2023. godinu odrede sredstva za isplatu naknade štete istima u dužnom iznosu po presudama nadležnih sudova.

Stav predlagača

U skladu sa članom 138. stav 6. Zakona o izvršnom postupku (Službene novine FBiH broj 32/03, 52/03, 33/06, 39/06, 39/09, 35/12 i 46/16) u Prijedlogu Budžeta Grada Zenica za 2023. godinu, na poziciji "Prisilno izvršenje pravosnažnih sudskih rješenja koje realizuje banka" planirana su sredstva u iznosu od 250.000,00 KM. Ova sredstva realizuje banka po redoslijedu izvršenja sudskih presuda.

4. Javna ustanova Predškolski odgoj i obrazovanje Zenica dostavila je svoje sugestije na utvrđeni Nacrt Budžeta za 2023. godinu, te predlaže:

- povećanje sredstava planiranih na budžetskoj poziciji "Finansiranje djelatnosti predškolskog odgoja i obrazovanja" sa iznosa od 820.000,00 KM na iznos od 1.500.000,00 KM, a koliko bi iznosio trošak samo za plaće radnika na godišnjem nivou i
- povećanje sredstava planiranih na budžetskoj poziciji "Kapitalni transfer JU Predškolski odgoj i obrazovanje Zenica" sa iznosa od 70.000,00 KM na iznos od 200.000,00 KM.

Stav predlagača

Predlagač je razmotrio, te djelimično prihvatio dostavljeni prijedlog pod prvom alinejom i Prijedlogom Budžeta za 2023. godinu na budžetskoj poziciji "Finansiranje djelatnosti predškolskog odgoja i obrazovanja" planirao iznos od 900.000,00 KM, uz obrazloženje resorne Službe za socijalnu zaštitu, stambene poslove i društvene djelatnosti da je prije opredjeljenja dodatnih sredstava potrebno izvršiti finansijsku analizu poslovanja Ustanove, a zbog postojećih problema sa isplatom redovnih obaveza iste.

Pored navedenog, Grad Zenica iz budžeta plaća i troškove grijanja ove Ustanove direktno JP-u "Grijanje" d.o.o. Zenica u godišnjem iznosu od cca 130.000,00 KM.

5. Vijećnici Ekrem Tuka, Almir Babajić, Aida Halać, Elvir Purić i Elmir Duvnjak predlažu uvećanje sredstava na poziciji "Transferi za sport" za iznos od 200.000,00 KM.

Takođe, vijećnik Ekrem Tuka predložio je povećanje sredstva na poziciji " Programi i projekti iz oblasti sporta" za iznos od 20.000,00 KM.

Stav predlagača

Predlagač je prihvatio prijedloge i Prijedlogom Budžeta za 2023. godinu, na ime sporta planirana su sredstva u ukupnom iznosu od 2.552.000,00 KM, i to na sljedećim pozicijama:

- "Tekući transferi za sport" u iznosu od 950.000,00 KM (a što je za 200.000,00 KM više u odnosu na Nacrt Budžeta);
- "Izmirenje poreznog duga NK Čelik Zenica po zaključenom Sporazumu – reprogram" u iznosu od 337.000,00 KM;
- "Transferi za sport - besplatna škola plivanja i skijanja" u iznosu od 5.000,00 KM;
- "Programi i projekti iz oblasti sporta" u iznosu od 40.000,00 KM (a što je za 20.000,00 KM više u odnosu na Nacrt Budžeta);
- "Finansiranje rada JP za upravljanje i održavanje sportskih objekata d.o.o. Zenica" u iznosu od 400.000,00 KM;
- "Izgradnja i uređenje igrališta i sportskih terena" u iznosu od 400.000,00 KM;
- "Kapitalni transfer JP za upravljanje i održavanje sportskih objekata d.o.o. Zenica za rekonstrukciju i opremanje otvorenih bazena" u iznosu od 150.000,00 KM;
- "Izgradnja Eko kuće Smetovi" u iznosu od 250.000,00 KM i
- "Transfer za popravku infrastrukture na Boračkom jezeru" u iznosu od 20.000,00 KM.

Pored gore navedenog, planirana su i sredstva:

- u ukupnom iznosu od 220.000,00 KM na ime održavanja zelenih površina sportskih igrališta, te održavanje dječijih i sportskih igrališta,
- u iznosu od 120.000,00 KM za izradu potrebnih studija i dopuna projektno-tehničke dokumentacije za izgradnju zatvorenog bazena,
- u iznosu od 40.000,00 KM za izradu projektne dokumentacije skijaške staze za djecu na Smetovima i

- u iznosu od 20.000,00 KM za izradu glavnog projekta za rukometni stadion Papirna.

- 6.** JU Muzej Grada Zenica dostavili su primjedbe na Nacrt Budžeta koje se odnose na sljedeće:
- da se planiraju sredstva za sufinansiranje plaća radnika ove Ustanove u iznosu od 25.679,00 KM i
 - da se uvećaju sredstva na budžetskoj poziciji "Obnova kulturno-historijskog naslijeđa" na iznos od 50.000,00 KM.

Stav predlagača

Grad Zenica na ime kulture u Prijedlogu Budžeta za 2023. godinu planira sredstva u ukupnom iznosu od 1.750.000,00 KM, i to po pozicijama kako slijedi:

- "Tekući transferi za kulturu" u iznosu od 700.000,00 KM (a što je za 90.000,00 KM više u odnosu na Nacrt Budžeta),
- "Programi i projekti iz oblasti kulture" u iznosu od 40.000,00 KM (a što je za 10.000,00 KM više u odnosu na Nacrt Budžeta),
- "Oprema i adaptacija domova iz oblasti kulture" u iznosu od 1.000.000,00 KM, kao i
- "Obnova kulturno-historijskog naslijeđa" u iznosu od 10.000,00 KM.

Planirani iznos je za 1.030.000,00 KM, odnosno za 143% veći od iznosa planiranog Budžetom za 2022. godinu. Kao što se vidi u 2023. godini Grad planira uložiti znatna sredstva za adaptaciju krova objekta JU Bosanskog narodnog pozorišta.

Napominjemo da je članom 11. Zakona o pripadnosti javnih prihoda u Federaciji BiH ("Službene novine FBiH" broj: 22/06, 43/08, 22/09, 35/14 i 94/15) propisano da se iz kantonalnog budžeta finansira između ostalog i kultura, a Grad će i u narednom periodu, u skladu sa mogućnostima, nastojati da pomogne i podrži rad ustanova iz oblasti kulture.

Ističemo da pored planiranih sredstava za ustanove iz oblasti kulture, Grad direktno plaća i troškove po osnovu potpisanog ugovora sa JP "Grijanje" d.o.o. Zenica o isporuci toplotne energije za ove ustanove, a što na godišnjem nivou iznosi oko 135.000,00 KM.

7. Vijećnik Ekrem Tuka dostavio je prijedlog da se u Prijedlogu Budžeta za 2023. godinu povećaju planirana sredstva na budžetskim pozicijama "Tekući transferi za kulturu" i "Programi i projekti iz oblasti kulture".

Stav predlagača

Prijedlogom Budžeta za 2023. godinu uvećana su sredstva na poziciji "Tekući transferi za kulturu" sa iznosa od 610.000,00 KM na iznos od 700.000,00 KM, a na poziciji "Programi i projekti iz oblasti kulture" sa iznosa od 30.000,00 KM na iznos od 40.000,00 KM.

8. Udruženje "EKO FORUM" Zenica dostavilo je primjedbu na Nacrt Budžeta u smislu da se u Prijedlogu Budžeta za 2023. godinu planira nova pozicija "Izrada projektne dokumentacije za izgradnju saobraćajnice Planinarski dom Smetovi - Sviće" u iznosu od 25.000,00 KM.

Stav predlagača

Gradska uprava provodi aktivnosti na formiranju prijedloga budućeg izgleda i rješavanja buduće namjene prostora na izletištu Smetovi, a u sklopu kojeg će biti riješena i saobraćajna veza izletišta sa gradom. Pojava velikog broja vozila na izletištu i na putu do izletišta, značajno ugrožava boravak građana u prirodi, te je potrebno ponuditi druga rješenja koja uključuju veće korištenje javnog prijevoza, a značajno manje korištenje privatnih vozila.

Tek nakon pripreme plana koji će odrediti namjene prostora u sklopu izletišta, kao i saobraćajna rješenja do izletišta (uključujući eventualno formiranje jednosmjernog saobraćaja prema izletištu), a uvažavajući potrebu za kvalitetnijim javnim prijevozom do izletišta, te uključujući i dogovor sa potencijalnim investitorima za izgradnju žičare, čime se smanjuje potreba za velikim korištenjem privatnih vozila u pristupu izletišta, biće moguće pristupiti izradi projektne dokumentacije za alternativne saobraćajne pristupe do izletišta Smetovi.

9. Unija studenata Univerziteta u Zenici, vijećnici Malik Ejubović, Ekrem Tuka i Almir Babajić tražili su povećanje planiranih sredstava na budžetskoj poziciji "Transferi pojedincima - nagrade za nadarene učenike, studente, sportiste i dr."

Stav predlagača

Prijedlogom Budžeta za 2023. godinu, u okviru organizacionog koda 59010001 - Služba za socijalnu zaštitu, stambene poslove i društvene djelatnosti, na budžetskoj poziciji "Transferi pojedincima - nagrade za nadarene učenike, studente, sportiste i dr." planirana su sredstva u iznosu od 50.000,00 KM, a što je za 25.000,00 KM više u odnosu na Nacrt Budžeta.

10. Vijećnica Emina Tufekčić predložila je da se u Prijedlogu Budžeta za 2023. godinu planiraju sredstva za sufinansiranje sistema solarnih panela na stambenim jedinicama u iznosu od 250.000,00 KM.

Stav predlagača

Prema stavu resornog Sektora za ekologiju i komunalne poslove tokom 2023. godine planiraju se objaviti dva javna poziva vezana za energetske efikasnost, i to:

- Javni poziv etažnim vlasnicima objekata kolektivnog stanovanja za sufinansiranje projekata poboljšanja energetske efikasnosti stambenih zgrada. U sklopu Javnog poziva predviđena su tri lota i to: postavljanje termo-izolacione fasade minimalne debljine 10 cm, zamjena krovova izrađenih od azbestnih ploča, te zamjena slojeva ravnog krova i
- Javni poziv za vlasnike individualnih stambenih objekata za sufinansiranje projekata poboljšanja energetske efikasnosti. U sklopu Javnog poziva predviđena su dva lota i to: postavljanje termo-izolacione fasade minimalne debljine 10 cm, te nabavka i ugradnja toplotnih pumpi za grijanje i hlađenje.

S obzirom da je za energetske efikasnost Nacrtom Budžeta za 2023. godinu predviđen iznos od 600.000,00 KM, Sektor smatra da su ista dostatna za ova dva javna poziva, a da će se prijedlog za sistem solarnih panela uzeti u obzir kod planiranja sredstava za narednu godinu. Takođe, treba imati na umu da još uvijek nije usvojen novi Zakon o obnovljivim izvorima energije i efikasne

kogeneracije, a kojim će biti omogućeno potrošačima da sami proizvedu dio električne energije za vlastite potrebe, umjesto da je kupuju od snabdjevača.

11. Vijećnici Ekrem Tuka i Elvir Purić, zatim Derviš Kovačević, predsjednik MZ Šerići i poljoprivrednici s prostora grada Zenica predložili su povećanje sredstava na poziciji "Podsticaj poljoprivrednoj proizvodnji".

Stav predlagača

Prema stavu resorne Službe za privredu, gradsku imovinu i upravljanje razvojem, a na osnovu evidencija koje se vode u toj Službi, broj poljoprivrednih proizvođača na području grada Zenica se iz godine u godinu smanjuje. Kako bi zadržali postojeću proizvodnju smatraju da je potrebno uvećati podsticaje za pojedine oblasti i na taj način osigurati održivost poljoprivredne proizvodnje na području Grada.

U skladu sa gore navedenim, stav Službe je da postoji osnov za uvećanje predmetne budžetske pozicije, i to sa iznosa od 700.000,00 KM na iznos od 770.000,00 KM, a što je predlagač i prihvatio.

Napominjemo, da je za ove namjene u prošloj godini bio planiran iznos od 650.000,00 KM, tako da je u Prijedlogu Budžeta za 2023. godinu, ovaj iznos uvećan za 18,5%.

12. Klub vijećnika BHI-KF, vijećnik Elmir Duvnjak i JU Apoteka "Zdravlje" Zenica dostavili su primjedbe na Nacrt Budžeta, te predlažu da se u Prijedlogu Budžeta za 2023. godinu planiraju sredstva za troškove rada četiri depoa apoteka u iznosu od 100.000,00 KM i za troškove rada noćne dežure apoteke "Mr. Weiss" u iznosu od 132.000,00 KM.

Stav predlagača

Prijedlogom Budžeta za 2023. godinu, na ime zdravstvene zaštite planirana su sredstva u ukupnom iznosu od 4.610.000,00 KM, i to na sljedećim pozicijama:

- "Transfer za zdravstvo - JU Apoteka Zdravlje Zenica" iznos od 100.000,00 KM,
- "Programi i projekti iz oblasti zdravstva" iznos od 10.000,00 KM i
- "Rekonstrukcija i investiciono održavanje ambulant i depoa apoteka" iznos od 4.500.000,00 KM.

Potrebe za ulaganjem u zdravstvenu zaštitu su daleko veće od mogućnosti budžeta, te je predlagač imajući to u vidu, planirao veća sredstva u odnosu na prethodne godine, i to na ime izgradnje ambulant, depoa apoteka i hitne pomoći.

Takođe, predlagač smatra da je prije opredjeljenja dodatnih sredstva za finansiranje rada depoa apoteka u ruralnim područjima, neophodno utvrditi finansijsku opravdanost postojanja i rada istih.

13. Vijećnica Aida Halać i Udruženje za zaštitu i spašavanje životinja "Šapa" Zenica dostavili su prijedlog da se Prijedlogom Budžeta za 2023. godinu planira nova pozicija za kastraciju i sterilizaciju vlasničkih i napuštenih pasa.

Stav predlagača

Prema stavu resornog Sektora za ekologiju i komunalne poslove, Grad Zenica finansira u potpunosti sterilizaciju/kastraciju napuštenih pasa putem odabranog izvođača koji upravlja higijenskim servisom. Prema Okvirnom sporazumu u prošloj godini za ove namjene utrošeno je 12.770,00 KM. Što se tiče kastracije/sterilizacije vlasničkih pasa isto je obaveza vlasnika/imaoca napuštenih pasa, a u skladu sa Zakonom o zaštiti i dobrobiti životinja, kao i obaveza kantonalnog ministarstva koje je resorno za ovu problematiku.

14. Vijećnici Namir Škaljo i Elmir Duvnjak tražili su povećanje sredstva na ime finansiranja azila za napuštene životinje.

Stav predlagača

S obzirom da je Grad Zenica sa odabranim izvođačem koji upravlja higijenskim servisom potpisao Okvirni sporazum, a koji na godišnjem nivou iznosi 169.474,50 KM, Prijedlogom Budžeta Grada Zenica za 2023. godinu planiran je dostatan iznos za ove namjene, odnosno iznos od 170.000,00 KM.

Pored navedenog sporazuma, Grad Zenica je Prijedlogom Budžeta za 2023. godinu planirao i iznos od 70.000,00 KM za rekonstrukciju i investiciono održavanje skloništa za životinje, a što je za 20.000,00 KM više u odnosu na Nacrt Budžeta.

15. Vijećnici Almir Babajić, Ekrem Tuka, Elmir Duvnjak, Elvir Purić i Namir Škaljo predložili su da se i u 2023. godini planiraju sredstva za finansiranje izdataka za grijanje korisnika socijalne pomoći u iznosu od 100.000,00 KM.

Stav predlagača

Predlagač prihvata navedeni prijedlog, te je u odnosu na Nacrt Budžeta, Prijedlogom Budžeta za 2023. godinu, u okviru JU Centar za socijalni rad otvorena nova pozicija "Izdaci za grijanje korisnika socijalne pomoći" u iznosu od 100.000,00 KM.

16. Vijećnik Elmin Šabanović predložio je da se uvećaju sredstva za rad kulturno-umjetničkih društava na iznos od 50.000,00 KM.

Stav predlagača

Prijedlogom Budžeta za 2023. godinu, u okviru organizacionog koda 59010001 - Služba za socijalnu zaštitu, stambene poslove i društvene djelatnosti, na budžetskoj poziciji "Finansiranje nacionalnih udruženja, udruženja nacionalnih manjina i kulturno umjetničkih društava" planirana su sredstva u iznosu od 50.000,00 KM, a što je za 15.000,00 KM više u odnosu na Nacrt Budžeta.

17. Vijećnica Emina Tufekčić i Stečajni upravnik JKP "Zenicatrans-prevoz putnika" d.d. Zenica - u stečaju predložili su da se planiraju sredstva od 150.374,52 KM za potrebe uvezivanja radnog staža

bivšim uposlenicima JKP "Zenicatrans-prevoz putnika" d.d. Zenica - u stečaju, a u svrhu ostvarivanja prava na penziju za osam radnika.

Stav predlagača

Rješenjem Općinskog suda u Zenici, broj: 43 0 St 188119 20 St od 21.12.2020. godine, otvoren je stečajni postupak nad imovinom pravnog lica Javno komunalno preduzeće "Zenicatrans-prevoz putnika" d.d. Zenica.

U skladu sa odredbama Zakona o stečaju namirivanje svih potraživanja, pa i potraživanja od strane radnika, u nadležnosti je stečajnog upravnika. Shodno navedenom, problem uvezivanja staža za osam radnika treba da riješi stečajni upravnik iz stečajne mase.

18. Vijećnik Ekrem Tuka predložio je da se u okviru Službe civilne zaštite otvori nova pozicija "Kapitalni transferi neprofitnim organizacijama - zaštita i spašavanje" u iznosu od 15.000,00 KM, a za nabavku motornog čamca za spašavanje.

Stav predlagača

Predlagač prihvata navedeni prijedlog, te je u odnosu na Nacrt Budžeta, Prijedlogom Budžeta za 2023. godinu, u okviru Službe za civilnu zaštitu otvorena nova pozicija "Kapitalni transferi neprofitnim organizacijama - zaštita i spašavanje " u iznosu od 15.000,00 KM.

19. Klub vijećnika BHI-KF, MZ "Nemila" i Služba za vodoprivredu, putnu infrastrukturu i mjesne zajednice predložili su da se sredstva na poziciji "Rekonstrukcija i investiciono održavanje vodovodne i kanalizacione mreže" uvećaju za iznos od 260.000,00 KM, a za finansiranje vodovoda u MZ Nemila.

Stav predlagača

Predlagač prihvata navedeni prijedlog, tako da je Prijedlogom Budžeta za 2023. godinu na navedenoj poziciji planiran iznos od 660.000,00 KM.

20. JU Gradska biblioteka Zenica dostavila je primjedbe na Nacrt Budžeta, te predložila da se planiraju sredstva za sufinansiranje plaća radnika ove Ustanove u iznosu od 36.876,36 KM.

Stav predlagača

Grad Zenica na ime kulture u Prijedlogu Budžeta za 2023. godinu planira sredstva u ukupnom iznosu od 1.750.000,00 KM, i to po pozicijama kako slijedi:

- "Tekući transferi za kulturu" u iznosu od 700.000,00 KM (a što je za 90.000,00 KM više u odnosu na Nacrt Budžeta),
- "Programi i projekti iz oblasti kulture" u iznosu od 40.000,00 KM (a što je za 10.000,00 KM više u odnosu na Nacrt Budžeta),
- "Oprema i adaptacija domova iz oblasti kulture" u iznosu od 1.000.000,00 KM, kao i
- "Obnova kulturno-historijskog naslijeđa" u iznosu od 10.000,00 KM.

Planirani iznos je za 1.030.000,00 KM, odnosno za 143% veći od iznosa planiranog Budžetom za 2022. godinu. Kao što se vidi u 2023. godini Grad planira uložiti znatna sredstva za adaptaciju krova objekta JU Bosanskog narodnog pozorišta.

Napominjemo da je članom 11. Zakona o pripadnosti javnih prihoda u Federaciji BiH ("Službene novine FBiH" broj: 22/06, 43/08, 22/09, 35/14 i 94/15) propisano da se iz kantonalnog budžeta finansira između ostalog i kultura, a Grad će i u narednom periodu, u skladu sa mogućnostima, nastojati da pomogne i podrži rad ustanova iz oblasti kulture.

Ističemo da pored planiranih sredstava za ustanove iz oblasti kulture, Grad direktno plaća i troškove po osnovu potpisanog ugovora sa JP "Grijanje" d.o.o. Zenica o isporuci toplotne energije za ove ustanove, a što na godišnjem nivou iznosi oko 135.000,00 KM.

21. JP "RTV Zenica" d.o.o. Zenica predlaže da se Prijedlogom Budžeta, sredstva na poziciji "Finansiranje dijela proizvodnje i emitovanje programa JP RTV Zenica" planiraju u iznosu od 660.000,00 KM, a na poziciji "Razvoj emisionog sistema JP RTV Zenica" u iznosu od 150.000,00 KM.

Stav predlagača

Prijedlogom Budžeta za 2023. godinu za potrebe JP-a "RTV Zenica" d.o.o. Zenica na poziciji "Finansiranje dijela proizvodnje i emitovanje programa JP RTV Zenica" planirana su sredstva u iznosu od 380.000,00 KM i na poziciji "Razvoj emisionog sistema JP RTV Zenica" u iznosu od 50.000,00 KM, a što je u skladu sa mogućnostima budžeta.

Napominjemo da cjelokupno planirani iznos za ovo preduzeće bude transferisan tokom godine, bez obzira na procenat ostvarenja prihoda, odnosno dinamiku punjenja budžeta.

22. Društvo sa ograničenom odgovornošću Željezara "Zenica" Zenica - u stečaju tražilo je obrazloženje da li su u okviru sredstava u iznosu od 2.000.000,00 KM, planiranih na ime eksproprijacije, uključena i dva Sporazuma o naknadi zaključena sa Gradom Zenica dana 02.12.2022. godine.

Stav predlagača

Prema stavu resorne službe – Službe za imovinsko-pravne, geodetske poslove i katastar nekretnina, prilikom planiranja rashoda na poziciji "Nabavka zemljišta i drugih nekretnina (eksproprijacije)" uzeti su u obzir i Sporazumi zaključeni sa društvom Željezara "Zenica" Zenica - u stečaju.

23. Udruženje poslodavaca Zenica dostavili su primjedbu na planirana sredstva na poziciji "Transferi privatnim preduzećima i preduzetnicima (sufinansiranje projekata, finansiranje obrta i preduzetništva)", te predložili da se ista uvećaju za 200.000,00 KM.

Stav predlagača

Predlagač prihvata navedeni prijedlog, tako da je Prijedlogom Budžeta za 2023. godinu na navedenoj poziciji planiran iznos od 300.000,00 KM.

24. Vijećnik Namir Škaljo predložio je da se planiraju sredstva u iznosu od 10.000,00 KM za finansiranja potreba Gorske službe spašavanja.

Stav predlagača

Služba civilne zaštite, kao resorna Služba, smatra "da se prijedlog ne može prihvatiti jer je članom 184. Zakona o zaštiti i spašavanju ljudi i materijalnih dobara precizno definisano da Grad iz sredstava ostvarenih po osnovu posebne naknade za zaštitu od prirodnih i drugih nesreća finansira pripremanje, opremanje, finansiranje i obuku Gradskog štaba civilne zaštite, službi zaštite i spašavanja, operativnog centra i jedinica civilne zaštite koje organizuje Grad, te povjerenika civilne zaštite Grada, kao i troškove koji nastanu tokom njihovog sudjelovanja u provođenju mjera zaštite i spašavanja po naređenju Gradskog štaba civilne zaštite. Iz naprijed navedenog jasno je da se navedena sredstva ne koriste za finansiranje udruženja građana i nevladinih organizacija. Postojeća pozicija "Tekući transferi neprofitnim organizacijama - finansiranje rada DVD" je obaveza Grada da pruža pomoć DVD za finansiranje poslova iz njihove nadležnosti, a posebno za finansiranje dobrovoljnih vatrogasnih jedinica što je definisano članom 138. Zakona o zaštiti od požara i vatrogastvu, kao i članom 4. Odluke o visini naknade za vatrogastvo. Za ovaj transfer sredstva se osiguravaju iz namjenskih sredstava prikupljenih po osnovu naknade za vatrogastvo.

Napominjeno da je Grad Gorskoj službi spašavanja ustupio na korištenje bez naknade dvije prostorije u Vatrogasnom domu i bez obaveze plaćanja troškova komunalnih usluga i potrošnje električne energije. Takođe, Grad po zahtjevu Gorske službe spašavanja osigurava vozila za prijevoz pripadnika službe i opreme za obuku, certificiranje i pokazne vježbe, te pruža drugu pomoć u skladu sa svojim mogućnostima".

25. Udruženje "DLAN" i servisni centar Zenica predlaže da se Prijedlogom Budžetom za 2023. godinu planira posebna budžetska pozicija za redovno finansiranje ovog Udruženja.

Stav predlagača

Stav resorne službe - Službe za socijalnu zaštitu, stambene poslove i društvene djelatnosti je da se planirana sredstva za finansiranje rada udruženja raspoređuju putem javnih poziva, kao i finansiranjem programskih aktivnosti nevladinih organizacija/civilnih društava po pojedinačnim zahtjevima, a na koje se može prijaviti i ovo udruženje.

26. Klub vijećnika BHI-KF, Naroda i pravde i Nezavisnog bloka, te predsjedavajući gradskog vijeća Mirza Husetić predlažu da se Prijedlogom Budžeta za 2023. godinu planira posebna budžetska pozicija za finansiranje planinarskih i lovačkih udruženja u iznosu od 70.000,00 KM.

Stav predlagača

Predlagač prihvata navedeni prijedlog, te je u odnosu na Nacrt Budžeta, Prijedlogom Budžeta za 2023. godinu, u okviru Službe za socijalnu zaštitu, stambene poslove i društvene djelatnosti otvorena nova pozicija "Finansiranje planinarskih i lovačkih udruženja" u iznosu od 70.000,00 KM.

27. Ekološko udruženje EKO TVRTKOVAC dostavilo je sugestije na Nacrt Budžeta za 2023. godinu, i to u smislu da se u Prijedlog Budžeta planiraju sredstva namijenjena za izgradnju Eko kuće na stadionu (Ravne) u Radinovićima u iznosu od 30.000,00 KM i izgradnju akva parka sa eko selom u Domu Puhovac u iznosu od 50.000,00 KM.

Stav predlagača

Prema stavu savjetnika Gradonačelnika za komunalne djelatnosti i infrastrukturu "nije moguće planirati izgradnju Eko kuće ili bilo kakvog sličnog objekta bez definisanja namjene objekta, te kome će objekat biti predat na upravljanje i održavanje. Grad Zenica finansira izgradnju objekata od javnog interesa za sve građane, uz jasan status namjene objekta i njegovog korištenja u budućnosti, a to se rješava prije pokretanja procedura za gradnju, koje uključuju i izradu projekta, odnosno rješavanje imovinsko pravnih odnosa. Trenutno je u toku izgradnja Eko kuće na lokalitetu Smetova, koja će biti predata na upravljanje i održavanje Savezu izviđača grada Zenica i taj objekat zadovoljava potrebe za objektima ove namjene u narednom periodu.

Izgradnja aqua parka je vezana za lokaciju na kojoj je moguće organizovati pristup dovoljnog broja korisnika, u urbanom području, gdje je moguće izgraditi i druge prateće sadržaje koji će omogućiti da investicija u izgradnju aqua parka bude samoodrživa. Lokalitet koji navodite ni u kom slučaju nije pogodan za izgradnju aqua parka zbog udaljenosti za eventualne posjetioce i zbog nedostatka drugih sadržaja koji će omogućiti samoodrživost projekta, zatim isti nije postojećom prostorno planskom dokumentacijom planiran da se gradi na predloženom lokalitetu, te zbog velikih ulaganja u izgradnju infrastrukture neophodne za funkcionisanje aqua parka sa nekoliko hiljada posjetilaca dnevno".

28. Klub vijećnika BHI-KF, Naroda i pravde i Nezavisnog bloka predlažu da se Prijedlogom Budžeta za 2023. godinu planiraju sredstva za troškove rada predsjednika mjesnih zajednica.

Stav predlagača

Predlagač prihvata navedeni prijedlog, te je u odnosu na Nacrt Budžeta, Prijedlogom Budžeta za 2023. godinu u okviru Službe za vodoprivredu, putnu infrastrukturu i mjesne zajednice otvorena nova pozicija "Naknade troškova rada predstavnika MZ" u iznosu od 74.000,00 KM, uz napomenu da je za realizaciju istih potrebna prethodna izmjena i dopuna Odluke o organizaciji mjesne samouprave.

29. Udruženje privrednika Grada Zenica na Nacrt Budžeta Grada Zenica za 2023. godinu dostavili su prijedloge za povećanje sredstava na budžetskim pozicijama i kreiranje novih budžetskih pozicija u okviru Službe za privredu, gradsku imovinu i upravljanje razvojem, i to:

- povećanje sredstava na poziciji "Izgradnja, rekonstrukcija i investiciono održavanje poslovnih zona (Zenica 1, Zenica-sjever, Zenica-jug)" za iznos od 500.000,00 KM;
- otvaranje nove pozicije "Izdvajanje sredstava na ime održavanja privrednih susreta i međunarodnog privrednog sajma u Gradu Zenica te podržavanje privrede i naučno-istraživačke institucije" u iznosu od 200.000,00 KM;
- povećanje sredstava za podršku projektima Udruženja privrednika i poduzetnika Grada Zenica za iznos od 50.000,00 KM i

- otvaranje nove pozicije za subvencioniranje privrednih subjekata pri nabavci opreme (mašine, alati i softveri), te uređaja obnovljivih izvora energije i procesa energetske efikasnosti u iznosu od 1.300.000,00 KM.

Stav predlagača

Stav resorne Službe za privredu, gradsku imovinu i upravljanje razvojem je slijedeći:

- prema planiranim aktivnostima i radovima u poslovnim zonama za 2023. godinu na poziciji "Izgradnja, rekonstrukcija i investiciono održavanje poslovnih zona (Zenica 1, Zenica-sjever, Zenica-jug)" dovoljan je planirani iznos od 1.000.000,00 KM. Pored sredstava planiranih Prijedlogom Budžeta, Služba će pratiti i po mogućnosti iznaći dodatna sredstva putem apliciranja na javne pozive viših nivoa vlasti i međunarodnih organizacija.
- Nacrtom i Prijedlogom Budžeta formirana je pozicija "Transfer neprofitnim organizacijama – udruženja" na kojoj je planiran iznos od 30.000,00 KM, a u cilju podrške implementaciji projekata udruženja koja djeluje u oblasti privrede i poljoprivrede.
- predlagač je na prijedlog Udruženja poslodavaca Zenica već uvećao budžetsku poziciju "Transferi privatnim preduzećima i preduzetnicima (sufinansiranje projekata, finansiranje obrta i preduzetništva)" sa iznosa od 100.000,00 KM na iznos od 300.000,00 KM, a što je prvobitno bio i zahtjev Službe.

30. Na Nacrt Budžeta za 2023. godinu BZK "Preporod" Zenica dostavilo je primjedbu da se u Prijedlogu Budžeta izdvoji posebna budžetska pozicija za finansiranje ovog društva.

Stav predlagača

Stav resorne službe - Službe za socijalnu zaštitu, stambene poslove i društvene djelatnosti je da su u okviru njihovog organizacionog koda planirana sredstva za finansiranje nacionalnih udruženja, udruženja nacionalnih manjina i kulturno umjetničkih društava, te bi izdvajanjem samo jednog nacionalnog društva u budžetu, ostala nacionalna društva doveli u diskriminirajući položaj. Napominjemo da su Prijedlogom Budžeta za 2023. godinu, sredstva na ovoj poziciji uvećana u odnosu na Nacrt Budžeta, za 15.000,00 KM.

31. NK "Nemila" Nemila na Nacrt Budžeta za 2023. godinu dostavio je primjedbu da se u Prijedlogu Budžeta planiraju sredstva na ime održavanja stadiona NK "Nemila".

Stav predlagača

Shodno prijedlogu resorne službe - Službe za socijalnu zaštitu, stambene poslove i društvene djelatnosti moguće je u okviru sredstava planiranih na poziciji "Transferi za sport" – interventna sredstva, po provedenom javnom pozivu i zahtjevu NK "Nemila", izdvojiti sredstva i za ovu namjenu.

32. Na Nacrt Budžeta za 2023. godinu primjedbu su dostavili NK "Čelik", član uprave Robert Jonjić i generalni direktor Emir Čerim, te vijećnici Almir Babajić, Emina Tufekčić, Elmir Duvnjak i Namir Škaljo, i to da se u Prijedlogu Budžeta otvori nova pozicija "Izmirenje obaveza prema

Sporazumu o međusobnoj saradnji s NK Čelik - transfer sredstava od zakupnina poslovnih prostora u Bilinom polju" u iznosu od 701.382,45 KM.

Takođe, NK "Čelik" je dostavio prijedlog da se doradi član 40. Nacrta Odluke o izvršavanju Budžeta Grada Zenica za 2023. godinu, kojim bi se uredio način plaćanja sredstava od zakupnina poslovnih prostora u Bilinom polju.

Stav predlagača

Gradsko vijeće Zenica je na 7. sjednici održanoj dana 22.02.2021. godine donijelo Zaključak, broj: 01-45-3665/21 od 22.02.2021. godine, o stavljanju van snage Zaključka, broj: 01-45-17039/20 od 20.08.2020. godine, a kojim je bilo odlučeno da poslovni prostori u sklopu Stadiona "Bilino polje" ostaju na upravljanje Gradskoj upravi, s tim da se sredstva od iznajmljivanja navedenih poslovnih prostora preusmjeravaju NK "Čelik" Zenica od 01.01.2021. godine. Takođe, istim je odlučeno da će Grad Zenica svoju finansijsku podršku NK "Čelik" pružati u skladu sa zakonom, aktima Gradskog vijeća i Gradonačelnika, te nadležnih tijela uprave, kojima se uređuje finansiranje sporta, uvažavajući finansijske mogućnosti i nadležnosti Grada kao jedinice lokalne samouprave.

Rješavajući po tužbi NK "Čelik" protiv Grada Zenica, radi isplate duga po osnovu neispunjavanja obaveza iz člana 2. alineja 3. Sporazuma o saradnji, Općinski sud u Zenici donio je Presudu, broj: 43 0 Ps 198301 21 Ps 02.11.2022. godine, kojom je utvrdio da se tužbeni zahtjev NK "Čelik" temelji na ništavoj odredbi i isti odbio kao neosnovan, obzirom da je gore navedena odredba Sporazuma, suprotna odredbama Zakona o budžetima u Federaciji BiH.

Napominjemo, da su Prijedlogom Budžeta Grada Zenica za 2023. godinu planirana sredstva na poziciji "Tekući transferi za sport" u iznosu od 950.000,00 KM, odnosno za 200.000,00 KM više u odnosu na Nacrt Budžeta. Naime, ova sredstva predviđena su za sve sportske klubove, pa i za NK "Čelik", a ista se realizuju kroz javni poziv svim sportskim klubovima i organizacijama koji se prijave.

Na kraju ističemo da je na Nacrt Budžeta Grada Zenica za 2023. godinu, kako se vidi iz ovog materijala, dostavljen veći broj primjedbi, prijedloga i sugestija od strane vijećnika, političkih stranaka, javnih ustanova, javnih preduzeća i udruženja od kojih je predlagač, a u skladu sa mogućnostima, pojedine prihvatio i ugradio u Prijedlog Budžeta za 2023. godinu.

Na Nacrt Odluke o izvršavanju Budžeta za 2023. godinu dostavljen je jedan prijedlog koji nije mogao biti prihvaćen, jer se istim predlaže način realizacije sredstava koja nisu planirana u Prijedlogu Budžeta Grada Zenica za 2023. godinu.

SLUŽBA ZA FINANSIJE